



### **Aua da baiver - rimplazzamaint armaturas e manisaziun dal sistem da process - etappa 2024**

Per garantir la qualità da l'aua da baiver esa important cha'ls indriz sco eir l'elettronica dal sistem da process sun in ün bun ed actual stadi. Diversas cumponentas sun fingià veglias e ston ils prossems ons gnir rimplazzadas. Pel on 2024 esa previs da rimplazzar l'indriz per sbütter l'aua sco eir la clappa per l'aua da fö pro'l reservuar Vallatscha. Sper quistas lavurs esa previs d'actualisar l'elettronica pro la vasca Scheschna ingiò chi vain surveglia il squitsch da la rait. Il gremi ha surdat l'incumbenza da rimplazzamaint pel 2024 a la ditta Hach Lange GmbH, Rheineck per ün import da 20'640.00 chf.

### **Reparaturas d'asfalt Lavin-Brail - surdatta da lavur**

In tuot las quatter fracziuns dal Cumün da Zernez esa necessari da far diversas lavurs da reparaturas d'asfalt e da vascas. L'incumbenza es gnüda surdatta a la firma Hew AG, Zernez.

### **Via Plan dal Bruoi, Zernez - schlargiamaint e refacziun - surdatta da lavur**

La Via Plan dal Bruoi, Zernez nu's cunfa a las pretaisas d'utilisaziun. La via es fich stretta e na adattada per l'utilisaziun agricula. Id es previs esa da schlargiar la via cun adattamaints da las scarpadas cun deposits dal material lung la via. Las lavurs sun gnüdas surdattas a la firma Foffa Conrad SA, Zernez.

### **Maschina da loipa - surdatta e furniziun**

La radunanza cumünala dals 8 december 2023 ha approvà ün credit per la fittanza d'üna macchina da loipa cun opziun da cumprita davo duos invierns. Davo avair scrit oura la fittanza e la cumprita tenor ledscha da submittiun in procedura averta, ha la furniziun da la nouva macchina da loipa pudü gnir surdatta a la firma Kässbohrer Schweiz AG, Altdorf.

### **Cuntschet da protecziun in Suot Via/Sosa - credit supplementar**

Las grondas auazuns da la fin d'avuost 2023 han chaschunà gronds dons vi da las scarpadas dal En (vers ost) sül perimeter Zobrist Cotti srl fin dadour la sarinera Zernez. Dürant las auazuns sun gnüdas trattas masüras immediatas per limitar ils dons. Uossa sun las lavurs da proget pel cuntschet da protecziun in Suot Via/Sosa gnüdas progettadas e planisadas. La suprastanza cumünala ha deliberà la dumonda da credit dad 1'500'000 chf a man da la radunanza cumünala dals 30 mai 2024.

### **Pendicularas Motta Naluns - permiss**

La direcziun operativa ha acconsenti a las Pendicularas Motta Naluns, Scuol il permiss per imbarchar in ün lö sül territori dal Cumün da Zernez d'ürant las stagiuns da stà, dal 2024 fin dal 2026.

### **Bogn da famiglia - adattamaint predschs**

In vista al cuosts da gestiun augmantats e la necessità da mantgnair la qualità ed il service i'l bogn da famiglia ha il gremi respunsabel decis d'augmentar ils predschs – per la prüma vouta daspö 18 ons - a partir dals 1. lügl 2024 per raduond 10%.

### **Radunanza cumünala - tractandas definitivs dals 30 mai 2024**

La suprastanza cumünala ha approvà la glista da tractandas definitiva per la radunanza cumünala dals 30 mai 2024. A quista radunanza vain preschantà principalmaing il rendaquint 2023. Ün'ulteriura tractanda sarà l'approvaziun d'ün credit d'investiziun in l'import da 1'500'000 chf per la finanziaziun d'ün cuntschet da protecziun cunter auas grondas in Suot Via/Sosa.

### **Dumondas da fabrica BaB**

La suprastanza cumünala ha concess in sia sezzüda trais permiss da fabrica per edificis dadour la zona da construcziun (BaB):

- Parcella no. 0869, Ouvras Electricas d'Engiadina SA - Ova Spin, Zernez - repars da lavinias e boudas, müdamaint da proget
- Parcella no. 1011, Ouvras Electricas d'Engiadina SA - La Drossa, Zernez - paravent tualettas publicas
- Parcella no. 1284, Patscheider Christian - Chasuot, Zernez - sanaziun lingia d'aua

**Il Cumün da Zernez ha acconsenti ils seguaints permiss da fabrica:**

- Parcella no. 0438, Jäger Linard e Stefanie, Brail - modificaziun tablà
- Parcella no. 1213, Kohler Landmaschinen AG, Zernez - containers da büro provisorics
- Parcella no. 0014, Crusch Alba AG, Zernez – sanaziun balcon e novs balcon